



Un exitoso jump-in di Nissan, YouthXtreme y TOB na Topcar

DIALUNA anochi, Nissan, YouthXtreme y TOB a organisa riba e parking-lot di Topcar un grandioso jump-in, cu a bira sigur un exito grandi. Durante e anochi aki, TOB a probecha, hayando sosten di su patron-isadornan, pa participantenan haya un descuento substancial. E promocion aki, a ser transmiti pa Tele Aruba, den su programa di Carnaval, Den Dje, dirigi pa Ivo Yanez.



Festival Tumberito despues di 5 año ta bek

E año aki un biaha mas, despues di 5 año cu Festival Tumberito tabata ausente, SAC ta presenta atrobe. E festival aki lo tuma lugar riba dia 31 di januari proximo y lo ta bao direccion musical di señor Amado Rosina y su orkesta.

Festival di Tumberito a conoce gran cantante den pasado cu te ainda bo ta mira activo den e festivalnan di adulto, manera Rodrick Franken (Rey di Tumba

2008), Ronwayne Kock (Calypso King 2007) y asina por sigui menciona diferente cantante cu di chikito a participa den Festival di Tumberito.

E comision di Tumberito ta consisti di Ralph Croes (President), Lionel Dorothal, "Mama Rosa", Gwenn Davelaar, Susan Kelly-Boekhoudt, Emilenne Boekhoudt y Rodrick Franken. Ya e comision ta den pleno preparacion di e festival y ta haci un yamado na may-

ornan cu tin muchanan infantil of hubenil pa inscribi. Pa mas informacion por tuma contacto cu oficina di SAC na 5824214 y nan lo referi na cualkier miembro di e comision of na Amado Rosina.

Pa inscribi e cantante su mayor of representante por acudi libremente na oficina di SAC durante dia y te 7or di anochi. Mester trece un medio di identificacion di e participante, pa asina por verifica su edad. Despues di inscribi e mayor ta acudi cerca Amado Rosina p'asina por cuminsa cu e preparacionan musical di e cantante.

Teniendo na cuenta cu prijs di tur cos ta halto, e comision ta haci un yamado na tur compositor y areglista pa duna un man na Festival di Tumberito. Sea asina bon di duna bo contribucion den forma di prijsnan reduci y modera pa composicion y areglo. Esaki lo duna mas mucha e oportunidad pa participa na Festival di Tumberito y kisas mañan nan lo por ta prominente cantante y musico di nos pais.

Aki ta sigui e fechanan importante pa Festival Tumberito: Dia 16 di januari ta ultimo dia pa inscribi, dia 20 di januari ta ultimo dia pa entrega areglo cerca Amado Rosina. Despues lo cuminsa cu e preparacion musical di cada participante y den e ultimo siman lo tene e diferente ensayonan cu e orkesta. Dia 19 di januari lo tin presentacion di tur e tumberitonan na publico y dia 29 di januari lo tira lot. Riba dia di Festival di Tumberito (31 di januari) mainta lo tene e ensayo general final y lo haci control di zonido.

